

佛說造塔功德經

唐中天竺三藏法師地婆訶羅奉勅譯



南無本師釋迦牟尼佛

說明

本繁體校正版《佛說造塔功德經》電子書，根據《乾隆大藏經》大乘單譯經，第 0519 部，唐中天竺三藏法師地婆訶羅奉勅譯《佛說造塔功德經》原藏影印本校正，句讀僅供參考。

本電子書是免費結緣品，特此說明。

仁慧草堂

二〇一八年八月

造塔功德經序

夫塔者，梵之稱，譯者謂之墳。或方或圓，厥製多緒，乍琢乍璞，文質異宜，並以封樹遺靈，肩鈴法藏，冀表河砂之德，庶酬塵劫之勞。豈伊弓劍衣冠，言申永慕；禹陵孔壁，用顯緘藏而已哉？將有量等大千，覆三界而高梵世；取均菴果，偶棗葉而譬針鋒。洪纖兩途，福應無二；大小千計，淨心終一。何只黃金白玉架迥爭暉，火齊水精浮空競彩。夕震¹祥飆之響，入鏤鐸以流清；晨霏仙露之甘，上彫盤以凝泫。至乃位隆三果、勳重四禪，高升有頂之宮，行屆無災之地。斯教之弘旨也。

此經以永隆元年冬十一月十五日，請天竺法師地婆訶羅^{此言日照}，與西明寺沙門圓測等五人，於弘福道場，奉詔宣譯，至其年十二月八日終其文義。庶斯法寶周給大千，俾彼慧燈照融三界。云爾。

¹ 大正藏：振

●起誦儀

香讚

(一編)

爐香乍爇. 法界蒙薰. 諸佛海會悉遙聞. 隨處結
祥雲. 誠意方殷. 諸佛現全身.

南無香雲蓋菩薩摩訶薩 (合掌三稱)

南無本師釋迦牟尼佛 (合掌三稱)

開經偈

(一編)

無上甚深微妙法 百千萬劫難遭遇
我今見聞得受持 願解如來真實義

佛說造塔功德經

唐中天竺三藏法師地婆訶羅奉勅譯²

如是我聞：

一時，佛在忉利天宮白玉座上，與大比丘大菩薩等，及彼天主無量眾俱。

時，大梵天王、那羅延天、大自在天及五乾闥婆王等，各與眷屬俱來至佛所，欲問如來造塔之法，及塔所生功德之量。

會中有菩薩，名觀世音，知其意，即從座起，偏袒右肩，右膝著地，合掌向佛，而作是言：「世尊！今此諸天、乾闥婆等故來至此，欲請如來造塔之法，及塔所生功德之量。惟³願世尊，為彼解說，利益一切無量眾生！」

爾時，世尊告觀世音菩薩言：「善男子，若此現在諸天眾等，及未來世一切眾生，隨所在方未有塔處，能於其中，建立之者：其狀高妙，出過三界，乃至至小如菴羅果；所有表刹上至梵天，乃至至小猶如針等；所有輪蓋覆彼大千，乃至至小猶如棗葉。於彼塔內，藏掩如來所有舍利、髮、

² 大正藏：大唐中天竺三藏法師地婆訶羅唐言日照譯

³ 大正藏：唯

牙、髭、爪，下至一分；或置如來所有法藏十二部經，下下至⁴於一四句偈。其人功德如彼梵天，命終之後，生於梵世，於彼壽盡，生五淨居，與彼諸天等無有異。善男子，如我所說如是之事，是彼塔量功德因緣，汝諸天等應當修學！」

爾時，觀世音菩薩復白佛言：「世尊！如向所說，安置舍利及以法藏，我已受持。不審如來四句之義，惟⁵願為我分別演說！」

爾時，世尊說是偈言：

諸法因緣生 我說是因緣
因緣盡故滅 我作如是說

「善男子，如是偈義名佛法身，汝當書寫，置彼塔內。何以故？一切因緣及所生法，性空寂故，是故，我說名為法身。若有眾生解了如是因緣之義，當知是人，即為見佛。」

爾時，觀世音菩薩及彼諸天一切大眾、乾闥婆等，聞佛所說，皆大歡喜，信受奉行。

佛說造塔功德經

⁴ 大正藏：下至

⁵ 大正藏：唯

● 結誦儀

補闕真言

(三編)

南無喝囉怛那. 哆囉夜耶. 佉囉佉囉. 俱住俱住.
摩囉摩囉. 虎囉. 吽. 賀賀. 蘇怛那. 吽. 潑抹拏. 娑
婆訶.

南無佛 南無法 南無僧 (合掌三稱)

南無一切如來、應、正等覺 (合掌三稱)

南無本師釋迦牟尼佛 (合掌三稱)

南無觀世音菩薩摩訶薩 (合掌三稱)

迴向偈

(一編)

誦經功德殊勝行 無邊勝福皆迴向
普願沉溺諸有情 速往無量光佛刹
十方三世一切佛 一切菩薩摩訶薩
摩訶般若波羅蜜

迴向偈

(一編)

願以此功德 莊嚴佛淨土
上報四重恩 下濟三途苦
若有見聞者 悉發菩提心
盡此一報身 同生極樂國

三皈依

(一編)

自皈依佛，當願眾生，體解大道，發無上心；
自皈依法，當願眾生，深入經藏，智慧如海；自
皈依僧，當願眾生，統理大眾，一切無礙。和南
聖眾。



此咒置經書中可滅誤跨之罪

南无护法韦驮尊天菩萨

